



Rhaglen Gyfalaf y Loteri

Nodiadau Cymorth

Prosiectau Cyfalaf Bach



Mae'r Cyngor yn ymrwymedig i ddarparu gwybodaeth mewn print bras, Braille, Arwyddeg Prydain, Hawdd eu Darllen ac ar awdio. Ceisiwn ddarparu gwybodaeth mewn ieithoedd ar wahân i'r Gymraeg a'r Saesneg ar gais.

Gweithredwn [Bolisi Cyfle Cyfartal](#).

Cynnwys

Cyflwyniad	2
Gwneud Cais Ar-lein	3
Adran 1: Eich Sefydliad	6
Adran 2: Eich Cynnig Prosiect	9
Diwallu angen a nodwyd	10
Cyflawni prosiect o ansawdd uchel	11
Bod o fudd i'r cyhoedd	13
Sicrhau bod eich prosiect yn hollol hygyrch	14
Dangos eich cryfderau a'ch cynaliadwyedd	14
Cynllunio a rheoli prosiect llwyddiannus	17
Ariannu prosiect llwyddiannus	18
Rheoli Risg	21
Adran 3: Manylion yr Adeilad	22
Adran 4: Manylion y Prosiect	24
Adran 5: Datganiad	26
Adran 6: Atodiadau	27
Gwybodaeth ategol arall	28
Adran 7: Adolygu fy Nghais	29
Bwrw golwg dros eich cais	29
Beth i'w wneud os na allwch dderbyn arian gan y Loteri Genedlaethol	29
Ymwadiad	30
Cysylltu â Ni	30



Mae'r holl ddogfen hon wedi'i hyperddolennu. Wrth glicio ar y penawdau ar y tudalen cynnwys, eir â chi'n syth i'r adran berthnasol. Cliciwch i ddychwelyd i'r tudalen cynnwys.

Nodiadau Cymorth

Prosiectau Cyfalaf Bach

Cyflwyniad

Croeso i'n Nodiadau Cymorth ar gyfer y Rhaglen Gyfalaf: Prosiectau Cyfalaf Bach. Gallwch wneud cais i'r elfen hon o'r Rhaglen Gyfalaf ar gyfer prosiectau adeiladu bach annibynnol. Yr uchafswm y gallwch wneud cais amdano tuag at Brosiect Cyfalaf Bach yw £100,000.

Nod y nodiadau hyn yw eich helpu i gwblhau eich cais ar-lein.

Gwnawn egluro sut i ddefnyddio ein system ar-lein, yn ogystal â rhoi arweiniad i chi ar y wybodaeth y mae'n rhaid i ni ei chael am eich prosiect. Gwnawn hefyd ddweud wrthy'ch pam ein bod yn gofyn am wybodaeth benodol a sut y gwnawn ddefnyddio'r wybodaeth a rowch i ni. Dylai'r holl wybodaeth rydych yn ei rhoi fod mor gywir a chyfredol â phosibl.

Bydd hefyd angen i chi gyflwyno dogfennau ategol gyda'ch cais. Bydd y nodiadau hyn yn egluro mwy am y dogfennau sydd eu hangen gennych, a sut i'w cyflwyno.

Sut i ddefnyddio'r Nodiadau Cymorth hyn

Gall y Nodiadau Cymorth hyn gael eu darllen ar eu pen eu hunain neu gallwch ddilyn yr hyperddolenni er mwyn edrych ar adrannau penodol o'r nodiadau wrth i chi lenwi eich ffurflen ar-lein. Dylai'r rhain gael eu darllen ar y cyd â'r [Canllaw Cyffredinol ar Raglen Gyfalaf Cyngor Celfyddydau Cymru](#), a'n [Strategaeth Gyfalaf ar gyfer 2012-2017](#).

"Eich Prosiect" a "Canlyniadau Prosiect"

Drwy'r nodiadau hyn siaradwn am "eich prosiect". Defnyddiwn y term hwn i ddisgrifio testun eich cais. Er enghraifft, gallai eich prosiect ymwneud â phrynu cyfarpar sain a goleuadau newydd ar gyfer eich theatr.

Rydym hefyd yn siarad am "canlyniadau prosiect". Defnyddiwn y term hwn i ddisgrifio'r hyn fydd yn digwydd os yw eich cais yn llwyddiannus a bod eich prosiect yn mynd rhagddo. Er enghraifft, gallai prosiect i brynu cyfarpar sain a goleuadau newydd olygu eich bod yn gallu llwyfannu mwy o gynyrchiadau, a allai wedyn arwain at fwy o incwm.

Atodiadau

Drwy'r nodiadau hyn, nodwn, mewn blychau, y wybodaeth ategol y mae'n rhaid i chi ei darparu gyda'ch ffurflen gais. Mae'n ein helpu i sicrhau bod eich sefydliad yn gymwys i wneud cais a / neu mae'n ein helpu gyda'n hasesiad.

Rhaid cyflwyno'r wybodaeth hon.

Gallwch ddarllen mwy am sut i lanlwytho'r wybodaeth hon gan ddefnyddio ein system ar-lein yn adran chwech o'r nodiadau hyn. Yma hefyd, byddwn yn eich atgoffa am y wybodaeth sydd ei hangen gennych.

Fformatau Amgen a Hygyrch

Weithiau bydd rhesymau penodol pam bod pobl yn ei chael hi'n anodd gwneud cais am grant i ddefnyddio ein gwasanaethau. Os byddwch yn cael neu'n disgwyl cael unrhyw broblemau wrth wneud cais, neu fod angen help arnoch i wneud cais, neu i ddefnyddio ein gwasanaethau a chael gafael ar ein gwybodaeth, cysylltwch â ni er mwyn trafod y mathau o gymorth y gallwn ei ddarparu. Rhoddir ein manylion cyswllt yma.

Cadw mewn Cysylltiad

O bryd i'w gilydd, efallai y bydd angen newid ein Rhaglen Gyfalaf. Cyhoeddir unrhyw newidiadau ar ein gwefan.

Drwy gofrestru yn <http://www.celf.cymru/> cewch y wybodaeth ddiweddaraf am ein harian Loteri yn awtomatig, yn ogystal â newyddion am ymgynghoriadau a mentrau eraill. Cofrestrwch nawr i gael ein Cylchlythyr neu i danysgrifio i'n ffrwd Newyddion. Neu dilynwch ni ar Twitter [@Celf_Cymru_](https://twitter.com/Celf_Cymru).

Gwneud Cais Ar-lein

Gallwch weld ein system gwneud cais ar-lein drwy fynd i'n [gwefan](#), a thrwy glicio ar y dolenni. Neu gallwch glicio [yma](#).

Ar ôl i chi glicio ar y botwm *Dechrau cais* bydd angen i chi gwblhau holiadur syml er mwyn gweld a ydych yn gymwys i wneud cais. Os yw'ch sefydliad yn gymwys gofynnir i chi ddewis ffurflen gais. Os byddwch yn gwneud unrhyw ddatganiadau camarweiniol neu anwir ar yr holiadur rhaid i chi ad-dalu unrhyw grant a roddir i chi. Os nad ydych yn siŵr, cysylltwch â ni.

Os mai hwn yw eich cais cyntaf bydd angen i chi greu cyfrif. Cliciwch ar y ddolen *Cyfrif Newydd* er mwyn cofrestru eich cyfeiriad e-bost a'ch cyfrinair. Y rhain fydd eich manylion mewngofnodi, a bydd eu hangen arnoch bob tro y byddwch yn defnyddio ein system gwneud cais ar-lein. Ni ddylech rannu'r manylion hyn ag unrhyw un y tu allan i'ch sefydliad.

Pan fyddwch yn gweithio ar eich cais ar-lein, mae'n werth cofio'r canlynol:

- Gallwch gwblhau eich cais mewn un sesiwn, neu weithio arno ar wahanol adegau.

- Gallwch lenwi'r adrannau yn y ffurflen ym mha bynnag drefn a fynwch, ond dim ond pan fydd pob adran wedi'i chwblhau y cewch gyflwyno eich cais
- Os bydd eich ffurflen gais ar agor ar eich cyfrifiadur, ond nad ydych yn gweithio arni am ddwy awr, cewch eich allgofnodi'n awtomatig o'n system ar-lein. Yna caiff unrhyw waith nad ydych wedi'i arbed ei golli

Bydd angen i chi siarad ag un o'n swyddogion cyn gwneud cais. Gallwn eich helpu i nodi'r swyddog priodol i siarad ag ef. Nid oes gan y Rhaglen Gyfalaf unrhyw derfynau amser. Ar yr amod eich bod wedi trafod eich prosiect gyda swyddog, cewch gyflwyno eich cais ar unrhyw adeg.

Rhestr Wirio Dechrau Arni

Gwnewch yn siŵr eich bod wedi darllen ein Canllaw Cyffredinol ar Raglen Gyfalaf Cyngor Celfyddydau Cymru cyn i chi ddechrau llenwi eich ffurflen gais.

Oes gennych chi bopeth sydd ei angen i gwblhau eich ffurflen gais?

- Manylion cyswllt a gwybodaeth eich sefydliad (oni bai eich bod wedi gwneud cais blaenorol gan ddefnyddio ein system ar-lein)
- Eich cynnig ysgrifenedig
- Manylion eich prosiect, gan gynnwys ei ddyddiadau dechrau a gorffen, dadansoddiadau o'r math o gelfyddyd a gwybodaeth cydraddoldeb
- Eich dogfen lywodraethu, fel cyfansoddiad, gweithred ymddiriedolaeth neu erthyglau cymdeithasu
- Cyllideb eich prosiect (rhaid ei chyflwyno ar y templed wedi'i lawrlwytho)
- Dadansoddiad manwl o'r costau adeiladu, dodrefnu a chyfarpar
- Set lawn o ddarluniau
- Eich manyleb dechnegol a rhestr o'r cyfarpar i'w brynu
- Eich briff prosiect terfynol
- Eich cynllun busnes

- Prawf bod gan eich sefydliad gyfrif banc lle mae angen i o leiaf ddau unigolyn awdurdodi trafodion
- Eich gwybodaeth ategol arall (a allai gynnwys caniatâd gan eich landlord i'r prosiect fynd rhagddo, dyfynbrisiau cyflenwyr, adroddiadau tendr, CVs ymgynghorwyr, prawf o ganiatâd cynllunio, cadarnhad o gyllid partneriaeth, arolwg strwythurol, caniatâd adeilad rhestredig ac ati.)

[Yn ôl i'r tudalen Cynnwys](#)

Adran 1: Eich Sefydliad

Yn yr adran hon rydym yn gofyn i chi ddarparu peth gwybodaeth sylfaenol am eich sefydliad. Mae'n bwysig bod y wybodaeth rydych yn ei rhoi i ni mor gywir a chyson ag unrhyw wybodaeth arall rydych wedi ei rhoi i ni, neu wybodaeth sydd wedi'i chyhoeddi eisoes fel:

- Gwybodaeth ar eich gwefan neu gyfryngau cymdeithasol
- Gwybodaeth y gallwn ddod o hyd iddi ar y we, neu
- Wybodaeth a ddelir gan gyrrff rheoleiddio fel y Comisiwn Elusennau a Thŷ'r Cwmnïau

Manylion Cyswllt

Gofynnwn am o leiaf dair set o fanylion cyswllt:

- Cyfeiriad eich sefydliad (rhaid mai prif swyddfa neu leoliad gweinyddol eich sefydliad yw hwn. Os ydych yn gwmni neu'n elusen, rhaid mai eich cyfeiriad cofrestredig presennol ydyw)
- Cadeirydd eich corff llywodraethu
- Yr unigolyn o fewn eich sefydliad sydd wedi'i awdurdodi i ddelio â phob mater sydd ynghlwm wrth y cais hwn (sef y Prif Gyswllt)

Byddwn yn cysylltu â'r Prif Gyswllt mewn perthynas â phob agwedd ar eich cais, a rhaid ei fod wedi'i awdurdodi gan eich sefydliad i lofnodi a chymeradwyo dogfennau ac ateb unrhyw ymholiadau a all fod gennym.

Rhaid bod gennym fanylion cyswllt ar gyfer mwy nag un unigolyn o sefydliad bob amser. Felly, os mai'r un unigolyn yw eich Cadeirydd a'r Prif Gyswllt, rhowch fanylion cyswllt arall sydd ag awdurdod priodol o'ch sefydliad.

Os bydd eich cais yn llwyddiannus, anfonir y cynnig grant at y Prif Gyswllt. Bydd yn gyfrifol am anfon y wybodaeth ychwanegol sydd ei hangen arnom er mwyn ymdrin ag unrhyw amodau penodol a roddir ar y grant, yn ogystal â'r adroddiadau ar gynnydd y gofynnwn amdanynt, ac adroddiad cwblhau unwaith y daw'r prosiect i ben.

Dim ond y tro cyntaf y byddwch yn gwneud cais i ni ar-lein y gofynnwn i chi ddarparu'r manylion cyswllt hyn. Gan eich bod eisoes wedi gwneud cais i ni, bydd y manylion hyn eisoes wedi'u rhoi ar eich ffurflen i chi eu hadolygu a'u diweddarau os oes angen.

Trydydd partïon

Rhaid mai eich sefydliad sy'n gyfrifol am bob cais, ac nid trydydd parti. Hyd yn oed os byddwch wedi cael help i ddatblygu eich cais, rhaid i'r manylion cyswllt a roddir gennych fod ar gyfer unigolion o'ch sefydliad sydd â'r awdurdod priodol i wneud penderfyniadau a llofnodi dogfennau fel contractau a chytundebau ariannu ar ran eich sefydliad.

Cofiwch na allwn gyfrannu at unrhyw gostau yr aed iddynt am gyngor a help wrth gwblhau eich cais.

Fel rhan o'n gweithdrefnau gwrth-dwyll, byddwn yn ymchwilio i unrhyw ffurflen gais a gyflwynwyd sy'n debyg iawn i eraill a gafwyd gennym. Byddwn hefyd yn ymchwilio os cyflwynir cais yn enw eich sefydliad a'n bod yn darganfod nad ydych yn ymwybodol o'r prosiect na'r cais am gyllid.

Eich sefydliad a'ch prif weithgareddau

Gofynnir i ni'n aml am y mathau o sefydliadau rydym yn eu hariannu a'r gweithgareddau celfyddydol a gynhelir ganddynt. Bydd y wybodaeth a roddir gennych yma yn ein helpu i ateb y cwestiynau hyn. Bydd hefyd yn ein helpu wrth i ni asesu eich cais. Mae tri pheth i chi eu gwneud:

- Dweud wrthym am eich sefydliad. Dim ond 500 gair y gallwch eu hysgrifennu felly meddyliwch am y prif ffeithiau sy'n crynhoi eich sefydliad, eich gweithgareddau celfyddydol arferol a'r ffordd rydych yn gweithio
- Dewiswch y categorïau mwyaf priodol o'r cwymplenni. Os nad ydych yn siŵr ym mha ranbarth Llywodraeth y'ch lleolir, defnyddiwch ein hadnodd [chwilio am god post ar-lein](#)
- Nodwch faint o staff cyflogedig neu wirfoddol sydd gennych. Mae hyn yn ein helpu i ddeall maint eich sefydliad a nifer y bobl a fydd yn cefnogi eich prosiect. Talgrynnwch y nifer hon

Atodiad: Dogfen Lywodraethu

Rhaid i chi gyflwyno dogfen lywodraethu eich sefydliad (fel cyfansoddiad, gweithred ymddiriedolaeth neu erthyglau cymdeithasu) gyda'ch cais, oni bai eich bod yn gyngor tref, awdurdod lleol, corff iechyd neu brifysgol (oherwydd cyrff statudol yw'r rhain).

Mae eich dogfen lywodraethu yn nodi sut mae eich sefydliad yn gweithio. Mae'n dweud wrthym am ddiben eich sefydliad a sut mae'n ei gyflawni.

Rydym yn cymryd y gwaith o ddosbarthu cyllid cyhoeddus o ddifrif, a dyna pam bod y ffordd rydych yn rhedeg eich sefydliad yn bwysig i ni. Rhaid i ni sicrhau bod eich sefydliad yn gadarn ac y gall reoli grant yn briodol.

Os byddwn wedi cael copi o'ch dogfen lywodraethu ers mis Ionawr 2016, dim ond os yw wedi newid y bydd angen i chi ei hailgyflwyno.

Gallwch ddarllen mwy am ein camau gwirio cymhwysedd a'r hyn y byddwn yn chwilio amdano yn eich dogfen lywodraethu yn ein [Canllaw Cyffredinol ar Raglen Gyfalaf Cyngor Celfyddydau Cymru](#). Mae ein [Taflen Wybodaeth](#) ar lywodraethu yn rhoi rhagor o ffynonellau cyngor.

Noder ein bod yn adolygu eich dogfen lywodraethu er mwyn ymdrin ag agweddau penodol ar ein meini prawf cymhwyso ac asesu. Wrth wneud hynny, nid ydym yn cynnal "archwiliad iechyd" llawn o'ch sefydliad nac yn cefnogi eich dull o lywodraethu. Os yw'ch sefydliad wedi'i gofrestru â Thŷ'r Cwmnïau neu'r Comisiwn Elusennau, chi sy'n gyfrifol am sicrhau eich bod wedi bodloni'r holl ofynion rheoleiddio priodol.

[Yn ôl i'r tudalen Cynnwys](#)

Adran 2: Eich Cynnig Prosiect

Yn yr adran hon rydym yn gofyn i chi fanylu ar eich prosiect. Yn hytrach na gofyn i chi ateb llawer o gwestiynau, hoffem i chi ysgrifennu cynnig ynglŷn â'ch prosiect.

Rydym wedi nodi saith thema eang y mae'n rhaid i bob cais am arian Loteri Cyfalaf ymdrin â nhw, sef:

- Diwallu angen a nodwyd
- Cyflawni prosiect o ansawdd uchel
- Bod o fudd i'r cyhoedd
- Sicrhau bod eich prosiect yn hollol hygyrch
- Dangos eich cryfderau a'ch cynaliadwyedd
- Cynllunio a rheoli prosiect llwyddiannus
- Ariannu prosiect llwyddiannus
- Rheoli risg

Bydd pob rhan o'ch cynnig yn ymwneud ag un o'r themâu hyn.

Mae'n bwysig eich bod yn dilyn y strwythur hwn a'r canllawiau ar y wybodaeth y mae angen i chi ei rhoi gan fod hyn yn ein helpu i gymharu tebyg at ei debyg fel rhan o'n proses asesu.

Ymhob rhan bydd angen i chi nodi rhai ffeithiau allweddol am eich prosiect. Hefyd, bydd angen i chi ddangos i ba raddau y mae eich prosiect yn ymdrin â phob thema. Nodir y wybodaeth sydd ei hangen isod.

Ni chyfyngir ar faint y gallwch ei ysgrifennu a rhaid i chi sicrhau bod eich cynnig yn rhoi'r holl wybodaeth rydym yn gofyn amdani.

Lle bynnag y bo modd, darparwch dystiolaeth i ategu eich cynnig. Yn arbennig, mae angen i ni weld dystiolaeth glir o alw a chefnogaeth i'ch prosiect. Bydd hefyd angen i chi anfon cyllideb y prosiect atom ynghyd â gwybodaeth i ategu eich prosiect. Cliciwch [yma](#) i ddarllen mwy am atodiadau.

Blaenoriaethau cyllid

Rydym yn defnyddio blaenoriaethau cyllid i'n helpu i dargedu ein buddsoddiad a dewis ceisiadau. Dim ond ceisiadau sy'n cyd-fynd yn gryf â'n blaenoriaethau y gwnawn eu hystyried.

Gallwch ddarllen mwy am ein blaenoriaethau cyllid yn y [Canllaw Cyffredinol ar Raglen Gyfalaf Cyngor Celfyddydau Cymru](#) a'n [Strategaeth Gyfalaf ar gyfer 2012-2017](#).

Sut rydym yn defnyddio eich cynnig prosiect

Gwyddom y bydd cryn alw am ein harian Loteri Cyfalaf a bod llawer o geisiadau da na allwn eu cefnogi am nad oes digon o arian ar gael.

Defnyddiwn y wybodaeth yn eich cynnig prosiect i'n helpu i wneud penderfyniad ar eich cais. Ystyriwn pa mor dda rydych wedi ymdrin â'r themâu eang a nodwyd gennym. Rydym hefyd yn ystyried ein blaenoriaethau strategol a chyllid, ein gwybodaeth am eich sefydliad a'ch prosiectau blaenorol a ariannwyd gennym. Gallwch ddarllen mwy am yr hyn rydym yn chwilio amdano wrth asesu eich cais yn y [Canllaw Cyffredinol ar Raglen Gyfalaf Cyngor Celfyddydau Cymru](#).

Diwallu angen a nodwyd

Dywedwch wrthym am eich prosiect a pham bod ei angen.

Nodwch ffeithiau allweddol eich prosiect. Byddwn yn gofyn am wybodaeth fanylach yn nes ymlaen, ond yma hoffem i chi grynhoi'r hyn rydych am ei wneud a beth fydd yn ei gyflawni, pam eich bod am ei wneud a pham ei fod yn bwysig i chi.

Yn eich cynnig prosiect, dylech wneud y canlynol:

- Disgrifio eich prosiect. Sôn am y gwaith adeiladu neu adnewyddu rydych am ei wneud, ynghyd ag unrhyw gyfarpar cysylltiedig rydych am ei brynu, a ble y caiff ei osod neu ei storio.
- Nodi sut mae eich prosiect yn cyd-fynd â nodau eich sefydliad:
 - Pam ei bod yn briodol i'ch sefydliad gyflawni'r prosiect hwn?
 - Sut y bydd yn eich helpu i ehangu ar yr hyn rydych yn ei wneud eisoes neu ei wella?
- Dweud wrthym sut rydych yn gwybod bod angen eich prosiect:
 - Pa dystiolaeth o alw sydd gennych?

- Â phwy rydych wedi ymgynghori ynglŷn â'ch prosiect, er enghraifft darpar ddefnyddwyr a buddiolwyr gan gynnwys artistiaid, staff, rhanddeiliaid, partneriaid prosiect? Sut mae eich prosiect yn diwallu eu hanghenion? Beth y gwnaethoch ei ddysgu?
 - A yw'ch prosiect yn rhan o gynllun strategol ehangach, er enghraifft strategaeth adfywio neu gelfyddydol a arweinir gan yr awdurdod lleol?
 - Sut y bydd yn cyfrannu at y seilwaith celfyddydol cenedlaethol?
- Nodi pam bod eich prosiect yn diwallu'r angen a nodwyd.

Atodiadau

Bydd angen i chi gyflwyno'r wybodaeth ganlynol gyda'ch ffurflen gais:

- Set lawn o ddarluniau dylunio
- Rhestr o gyfarpar i'w brynu ac unrhyw fanylebau technegol

Rydym yn chwilio am y canlynol:

- Disgrifiad clir o brosiect yr ymchwiliwyd iddo'n dda
- Y graddau rydych wedi dangos bod angen eich prosiect a pha mor dda mae'ch prosiect yn diwallu'r angen a nodwyd gennych

Cyflawni prosiect o ansawdd uchel

Dywedwch wrthym am weledigaeth eich prosiect. Beth rydych am ei gyflawni? Pa gamau a gymerwch i sicrhau bod eich prosiect yn addas at y diben ac y bydd o ansawdd uchel?

Yn eich cynnig prosiect, dylech wneud y canlynol:

- Nodi gweledigaeth a nodau eich prosiect. Sut y gwnaethoch gytuno ar y rhain?
- Nodi sut y gwnewch sicrhau eich bod yn cyflawni prosiect o ansawdd uchel:
 - Pa gamau rydych wedi eu cymryd i sicrhau bod eich prosiect wedi'i ddylunio'n dda?
- Dangos eich bod wedi ystyried ymarferoldeb eich prosiect:
 - Dangos sut mae unrhyw waith adeiladu neu adnewyddu yn briodol i'w ddefnydd arfaethedig, neu'n "addas at y diben"
 - Nodi sut y bydd eich prosiect yn gwneud defnydd arloesol o'r lle sydd gennych

- Dangos sut y bydd eich prosiect yn sicrhau cymaint o fynediad annibynnol â phosibl i'r ystod ehangaf o bobl, gan gynnwys pobl anabl, p'un a ydynt yn ymwelwyr, yn gyfranogwyr, yn artistiaid neu'n aelodau o staff:
- Dangos sut rydych wedi ystyried effaith ffisegol eich prosiect:
 - Nodi sut mae'n gweddu i weddill eich adeilad
 - Nodi sut y byddwch yn sicrhau bod unrhyw waith allanol yn integreiddio â'r adeiladau o amgylch a'r amgylchedd
- Dangos sut rydych wedi ystyried egwyddorion datblygu cynaliadwy yn eu hystyr ehangaf.
- Nodi sut rydych wedi ystyried perfformiad amgylcheddol eich prosiect:
 - Ddangos sut rydych yn anelu at leihau'r galw am ynni, yn ogystal â chynyddu effeithlonrwydd ynni, a sicrhau'r defnydd mwyaf posibl o danwydd adnewyddadwy
 - Nodi sut y byddwch yn gwneud y defnydd mwyaf posibl o ddeunyddiau cynaliadwy
 - Nodi sut rydych wedi ystyried perfformiad y cyfarpar rydych wedi dewis ei brynu
- Os ydych yn prynu cyfarpar, nodi:
 - Pa ymchwil a wnaed gennych er mwyn sicrhau bod unrhyw gyfarpar rydych am ei brynu yn addas at y diben ac yn diwallu'r angen a nodwyd gennych
 - Pa ymchwil a wnaed gennych i ansawdd y cynnyrch rydych am ei brynu ynghyd â'i hyd oes a'i gostau cynnal a chadw
 - Pa ymchwil a wnaed gennych i ddangos bod unrhyw gyfarpar rydych wedi dewis ei brynu yn cynnig gwerth am arian
- Nodi sut a pham rydych wedi dewis eich contractwr/contractwyr a chyflenwr/cyflenwyr, neu sut y gwnewch eu dewis, os nad ydynt wedi'u penodi eto
- Dangos sut y byddwch yn cyflawni eich rhwymedigaethau statudol ar y cam adeiladu o ran:
 - Rheoliadau Adeiladu
 - Iechyd a Diogelwch yn y Gwaith
 - Rheoliadau Adeiladu (Dylunio a Rheoli) (CDM) 2015
 - Rheoliadau Rheoli Asbestos

Wrth brynu nwyddau a gwasanaethau ar gyfer eich prosiect, rhaid i chi gydymffurfio â deddfwriaeth gaffael gyfredol y DU a'r UE sy'n gymwys i'ch sefydliad a'ch prosiect. Bydd yn ofynnol i unrhyw unigolyn neu sefydliad / contractwr sy'n gweithio ar eich prosiect a gaiff £5,000 neu fwy gael ei benodi drwy broses dendro gystadleuol. Os gwnaed y penodiadau hyn eisoes, bydd angen i chi gyflwyno adroddiad tendr priodol.

Os ydych yn bwriadu prynu cyfarpar nad yw'n rhan o brif gontract y prosiect, rhaid i chi gyflwyno tri dyfynbris gan gyflenwyr gwahanol ar gyfer pob eitem neu becyn o eitemau sy'n costio £2,500 neu fwy.

Os hoffech brynu pecyn o eitemau gan un cyflenwr a fydd yn costio £30,000 neu fwy dylech hefyd gyflwyno adroddiad tendr sy'n nodi pam eich bod wedi dewis defnyddio'r cyflenwr hwnnw a pham bod prynu'r cyfarpar yn y ffordd hon yn cynnig gwerth am arian.

Atodiad: Briff Prosiect Terfynol

Mae eich Briff Prosiect Terfynol yn hanfodol am ei fod yn nodi eich gofynion ar gyfer y prosiect, ac ar y ddogfen hon y bydd dyluniad terfynol eich adeilad yn seiliedig. Fe'i gelwir yn Friff Dylunio hefyd. Fel arfer, bydd yn cynnwys gwybodaeth am y safle a'ch gofynion gofodol a thechnegol, yn ogystal â gofynion prosiect allweddol eraill.

Defnyddiwn y Briff Dylunio Terfynol i ddeall maint eich prosiect a ph'un a yw'n addas at y diben.

Rydym yn chwilio am y canlynol:

- Gweledigaeth glir, priodol a chyflawnadwy, y mae holl randdeiliaid eich prosiect yn cytuno arni
- Y graddau rydych wedi dangos y gwnewch gyflawni prosiect o ansawdd uchel a wnaiff gyflawni eich gweledigaeth ac sy'n addas at y diben

Bod o fudd i'r cyhoedd

Dywedwch wrthym am effaith eich prosiect (canlyniadau'r prosiect) a'i fuddiannau i bobl Cymru.

Yn eich cynnig prosiect, dylech wneud y canlynol:

- Dweud wrthym am ganlyniadau eich prosiect. Beth a wnaiff newid os gallwch gyflawni'r prosiect hwn? Beth rydych yn gobeithio fydd effaith hirdymor eich prosiect?
- Nodi sut y bydd eich prosiect yn cyfrannu at y sector celfyddydol yng Nghymru. Dylech wneud hyn drwy ddangos sut mae eich prosiect yn cyd-fynd â'n blaenoriaethau cyllid ar gyfer y rhaglen Gyfalaf. Gallwch ddarllen mwy am ein

blaenoriaethau cyllid yn y [Canllaw Cyffredinol ar Raglen Gyfalaf Cyngor Celfyddydau Cymru](#) a'n [Strategaeth Gyfalaf ar gyfer 2012-2017](#).

- Disgrifio'r bobl a gaiff fudd o'ch prosiect a sut y cânt fudd. Er enghraifft:
 - A fydd eich prosiect o fudd i'r rheini sydd eisoes yn mwynhau eich gweithgareddau celfyddydol, naill ai fel aelod o'r gynulleidfa neu gyfranogwr?
 - A fydd eich prosiect yn helpu cynulleidfa ehangach i fwynhau eich gweithgareddau celfyddydol, neu'n annog pobl newydd i gymryd rhan?
 - A fydd eich prosiect yn helpu gweithwyr proffesiynol creadigol fel artistiaid a chrefftwyr i ddatblygu a chyflwyno eu gwaith?
 - A fydd eich prosiect o fudd i'ch staff a'ch gwirfoddolwyr
- Nodi sut y bydd eich prosiect yn effeithio ar ansawdd a swm y gwaith a wnewch.
- Nodi sut y byddwch yn gwneud canlyniadau eich prosiect mor gynhwysol â phosibl drwy egluro sut rydych wedi ystyried anghenion pobl anabl a grwpiau eraill sy'n anodd eu cyrraedd
- Nodi sut y byddwch yn marchnata canlyniadau eich prosiect er mwyn sicrhau'r ymwneud ehangaf posibl â'ch gweithgareddau celfyddydol.

Rydym yn chwilio am y canlynol:

- Disgrifiad clir o ganlyniadau arfaethedig eich prosiect
- Y graddau rydych wedi dangos y gellir cyflawni canlyniadau'r prosiect
- Y graddau rydych wedi rhoi ystyriaeth briodol i gynhwysiant, cydraddoldeb ac amrywiaeth, ac wedi dangos bod eich sefydliad yn ymrwymedig i leihau'r rhwystrau i ymweld a chymryd rhan

Sicrhau bod eich prosiect yn hollol hygyrch

- Pa fesurau a gymerasoch i sicrhau bod eich prosiect yn diwallu gofynion y Ddeddf Gydraddoldeb? Er enghraifft, a ymgymerasoch ag archwiliad hygyrchedd diweddar a sut yr ymgorfforwch unrhyw argymhellion yn eich cynnig?

Dangos eich cryfderau a'ch cynaliadwyedd

Dywedwch wrthym am eich sefydliad a sut y caiff ei reoli. Dangoswch eich bod wedi ystyried effaith ariannol eich prosiect ar eich sefydliad.

Yn eich cynnig prosiect, dylech wneud y canlynol:

- Dweud wrthym am eich strwythurau rheoli a staff, a sut y caiff eich sefydliad ei lywodraethu.
 - Pa sgiliau a phrofiad y mae eich corff llywodraethu yn eu cynnig i'r sefydliad?
- Dangos eich bod wedi ystyried effaith eich prosiect ar allu eich sefydliad i gyflawni ei weithgarwch arferol:
 - A ydych yn cymryd camau i gryfhau eich sefydliad tra'n cyflawni eich prosiect?
 - Nodi effaith unrhyw achos o gau adeilad fydd ei angen ar y cam adeiladu a sut y caiff hyn ei reoli
 - Nodi effaith y gwaith adeiladu ar eich rhaglen artistig a sut y caiff hyn ei reoli
- Dangos bod eich sefydliad yn ariannol gadarn ac yn cael ei reoli'n dda.
- Dangos eich bod wedi ystyried effaith ariannol eich prosiect yn llawn:
 - Dangos eich bod yn gallu talu unrhyw gostau rhedeg, cynnal a chadw a chylch oes newydd sy'n gysylltiedig â'ch prosiect bob blwyddyn. Sut rydych wedi cyfrifo'r costau hyn?
 - Nodi a yw eich asesiadau'n dangos y caiff eich prosiect effaith gadarnhaol ar gadernid ariannol eich sefydliad. Er enghraifft, drwy gynhyrchu incwm, torri costau neu eich galluogi i weithio gyda sefydliadau eraill.
- Dweud wrthym a fydd eich prosiect yn arwain at fentrau newydd neu'n eich helpu i ymateb i gyfleoedd newydd
- Dweud wrthym a fydd eich prosiect yn eich helpu i achub ar gyfleoedd ariannu o ffynonellau eraill

Atodiadau: eich cynllun busnes a'ch cyfrif banc

Cynllun Busnes

Rhaid i chi gyflwyno eich cynllun busnes diweddaraf er mwyn ategu'r rhan hon o'ch cynnig prosiect.

Mae hyn yn ein helpu i ddysgu mwy am eich sefydliad a'ch rhaglen artistig, a bydd yn ein helpu i ddeall cyd-destun eich prosiect.

Cyfrif Banc

Rhaid i chi brofi bod gennych gyfrif banc yn enw eich sefydliad lle mae angen i o leiaf ddau unigolyn awdurdodi trafodion. (Fel rheol, gelwir y bobl hyn yn llofnodwyr cyfrif). Ystyr trafodion yw unrhyw godiadau arian, trosglwyddiadau neu daliadau a wneir o gyfrif y sefydliad. Noder na allwn dderbyn cyfrifon cymdeithas adeiladu sy'n gweithredu â phaslyfr yn unig. Nid oes angen i chi gyflwyno prawf o'ch cyfrif banc os ydych yn gorff statudol.

Mae hyn yn ein helpu i sicrhau eich bod yn gymwys i wneud cais ac mae'n ein helpu i ddeall sut rydych yn rheoli eich arian. Rydym yn cymryd y gwaith o ddsbarthu cyllid cyhoeddus o ddifrif, a dyna pam bod y ffordd rydych yn rheoli eich materion ariannol yn bwysig i ni. Rydym yn disgwyl i'r sefydliadau rydym yn eu cefnogi weithredu systemau rheoli priodol sy'n sicrhau eu bod yn gallu rheoli unrhyw arian a gânt yn effeithiol ac yn briodol. Un o'r mesurau hyn yw ei gwneud yn ofynnol i o leiaf ddau o bobl awdurdodi trafodion.

Gwnawn dderbyn unrhyw gyfuniad o'r dogfennau canlynol i fodloni'r gofyniad hwn. Cofiwch ein bod yn chwilio am brawf fod y cyfrif yn enw'r sefydliad, a bod angen i o leiaf ddau o bobl awdurdodi trafodion:

- Sgan o slip talu wedi'i argraffu ymlaen llaw
- Sgan o siec wag
- Llythyr gan eich banc yn cadarnhau'r manylion sydd eu hangen arnom

Os bydd eich cais yn llwyddiannus, byddwn yn cadarnhau hyn drwy ofyn i chi roi rhagor o fanylion am eich cyfrif. Ni fyddwn yn gallu rhyddhau unrhyw daliadau nes i ni gael y wybodaeth hon a chadarnhau ei bod yn gywir. Ystyrir bod unrhyw anghysondeb yn fater difrifol ac ymchwilir iddo.

Rydym yn chwilio am y canlynol:

- Y graddau rydych wedi dangos bod eich sefydliad yn cael ei reoli'n dda a'i fod yn sefydlog, ac mewn sefyllfa dda i gyflawni prosiect cyfalaf
- Y graddau rydych wedi dangos bod eich sefydliad yn ariannol gadarn
- Y graddau rydych wedi ystyried effaith ariannol eich prosiect ar eich sefydliad

Cynllunio a rheoli prosiect llwyddiannus

Dywedwch wrthym am eich dull o ymdrin â'r prosiect. Nodwch pwy fydd yn gyfrifol am ei reoli a'i gyflawni a sut y byddwch yn sicrhau bod y prosiect ar y trywydd cywir.

Yn eich cynnig prosiect, dylech wneud y canlynol:

- Nodi sut y byddwch yn rheoli eich prosiect:
 - Pwy sy'n bennaf gyfrifol am ei gyflawni o fewn eich sefydliad?
 - A fyddwch yn gweithio gydag unrhyw un y tu allan i'ch sefydliad er mwyn cyflawni eich prosiect? Os felly, sôn am eu rôl, a pham y cawsant eu penodi
 - Sut y gwnewch sicrhau eglurder o ran rolau a chyfrifoldebau os ydych yn cyflawni eich prosiect mewn partneriaeth, neu ar y cyd ag un neu fwy o gontractwyr / cyflenwyr?
 - Dweud wrthym am unrhyw brofiad o gyflawni prosiectau tebyg. Beth y gwnaethoch ei ddysgu o'r rheini y gallwch ei roi ar waith yng nghyd-destun y prosiect hwn nawr?
- Nodi amserlen eich prosiect a dangos y gellir ei chyflawni.
- Nodi sut y byddwch yn sicrhau bod y prosiect ar y trywydd cywir:
 - Sut y byddwch yn rheoli ac yn monitro cyllideb eich prosiect?
 - Sut y byddwch yn rheoli eich tîm prosiect a'ch contractwr neu gontractwyr?
 - Sut y byddwch yn monitro hynt eich prosiect ac yn ei adrodd i'ch corff llywodraethu a'ch uwch aelodau o staff?
- Sut y byddwch yn gwybod a fu eich prosiect yn llwyddiannus?

Rydym yn chwilio am y canlynol:

- Y graddau rydych wedi dangos eich bod yn gallu cyflawni a rheoli eich prosiect yn llwyddiannus, gan sicrhau ei fod yn cael ei gwblhau ar amser ac o fewn y gyllideb.
- Pa mor dda rydych wedi dangos bod gan eich tîm prosiect y sgiliau a'r profiad gofynnol.

Ariannu prosiect llwyddiannus

Dywedwch wrthym am gyllideb eich prosiect a'r arian arall y mae angen i chi ei godi er mwyn gallu cyflawni eich prosiect.

Yn eich cynnig prosiect, dylech wneud y canlynol:

- Sôn am unrhyw dybiaethau a wnaed er mwyn llunio cyllideb eich prosiect.
 - Pa dystiolaeth sydd gennych i gefnogi'r ffigurau yng nghyllideb eich prosiect?
- Dweud wrthym am y cyllid arall sydd ei angen arnoch ar gyfer eich prosiect:
 - O ble y daw?
 - A yw ar gael?
 - Os nad yw wedi'i sicrhau, nodi sut y byddwch yn mynd ati i godi arian a dangos y codir yr arian mewn da bryd

Atodiadau: Cyllideb y Prosiect a dadansoddiad manwl o gostau

Rhaid i chi gyflwyno cyllideb eich prosiect gyda'ch ffurflen gais. Rhaid gwneud hyn ar ein templed ar gyfer cyllideb prosiect sydd ar gael i'w lawrlwytho o'r ffurflen gais.

Rhaid i chi hefyd gyflwyno dadansoddiad manwl o'r costau adeiladu, dodrefnu a chyfarpar er mwyn cefnogi eich cyllideb.

Rydym yn chwilio am y canlynol:

- Cyllideb prosiect sy'n seiliedig ar dybiaethau realistig ac sy'n briodol i faint a natur y prosiect rydych yn ei gyflawni
- Pa mor llwyddiannus rydych wedi bod yn codi arian a pha mor debygol ydych o godi'r holl arian sydd ei angen ar gyfer eich prosiect, os nad ydych wedi gwneud hynny eisoes

Sut i ddefnyddio'r templed ar gyfer cyllideb y prosiect

Rhaid i gyllideb eich prosiect gael ei chyflwyno ar ein [Templed ar gyfer Cyllideb Prosiect](#).

Bydd y templed yn cyfrifo is-symiau i chi'n awtomatig ac yn helpu i sicrhau eich balansau cyllidebol. Dylech gwblhau'r blychau gwyrdd ar y daenlen, lle bo'n briodol. Os na fydd rhai o'r penawdau'n berthnasol i'ch prosiect gallwch eu gadael yn wag. Ni ellir newid blychau gwyn. Defnyddiwch £ llawn yn unig.

Dylai cyllideb eich prosiect nodi cost eich prosiect (gwarant) a faint a gewch i dalu amdano (incwm). Dylai incwm a gwarant eich prosiect gyfateb.

Gwarant y Prosiect

Defnyddiwch y templed i grynhoi faint y bydd eich prosiect yn ei gostio. Defnyddiwch y penawdau i ddangos cost yr holl eitemau y byddwch yn talu amdanynt fel rhan o'ch prosiect.

Rhaid i'r costau rydych yn eu cynnwys fod yn gymwys. Gallwch ddarllen mwy am y costau y gallwn ac na allwn eu talu yn y Canllaw Cyffredinol ar Raglen Gyfalaf Cyngor Celfyddydau Cymru.

Gwaith adeiladu

Nodwch gyfanswm cost unrhyw waith adeiladu. Efallai y byddwch am rannu hyn yn wahanol becynnau gwaith, os byddwch yn defnyddio contractwyr gwahanol i gyflawni gwahanol elfennau o'r gwaith.

Mae digon o le ar y templed ar gyfer cyllideb prosiect i chi sôn am gost dau becyn gwaith. Os oes angen mwy o le arnoch, gallwch ddefnyddio'r adran "costau eraill" o'r templed.

Os ydych yn bwriadu talu £5,000 neu fwy i unigolyn neu sefydliad / contractwr, bydd angen i chi ei benodi gan ddilyn proses ddethol gystadleuol. Byddwn yn sicrhau eich bod wedi penodi pobl neu sefydliadau eraill i weithio ar eich prosiect yn briodol. Bydd disgwyl i chi gyflwyno o leiaf dri dyfynbris gan gontractwyr gwahanol.

Os ydych yn bwriadu talu £30,000 neu fwy i unrhyw unigolyn neu sefydliad / contractwr, bydd angen i chi gyflwyno adroddiad tendr sy'n nodi pam eich bod wedi dewis defnyddio'r contractwr hwnnw.

Os ydych eisoes wedi cael dyfynbrisiau neu dendrau ar gyfer eich prosiect, dylech ddefnyddio'r amcangyfrifon hyn fel sail ar gyfer cyllideb eich prosiect.

Cyfarpar

Nodwch gost y cyfarpar rydych am ei brynu. Dylech wahanu'r gost yn eitemau unigol neu'n becynnau o eitemau. Grŵp o eitemau rydych yn bwriadu eu harchebu gan un cyflenwr yw pecyn.

Dylai'r gost a nodir yng nghyllideb eich prosiect gyfateb i ddyfynbrisiau'r cyflenwyr a gyflwynir gyda'ch cais.

Mae digon o le ar y templed ar gyfer cyllideb prosiect i chi sôn am gost dwy eitem neu ddau becyn o eitemau. Os oes angen mwy o le arnoch, gallwch ddefnyddio'r adran "costau eraill" o'r templed.

Ffioedd Proffesiynol

Soniwch am unrhyw ffioedd proffesiynol y bydd angen i chi eu talu. Dylech nodi yn adran "Cynllunio a Rheoli Prosiect Llwyddiannus" o'ch cynnig prosiect pam bod angen i chi dalu ffioedd proffesiynol. Os ydych yn bwriadu talu £5,000 neu fwy i unigolyn neu sefydliad, bydd angen i chi ei benodi gan ddilyn proses ddethol gystadleuol. Byddwn yn sicrhau eich bod wedi penodi pobl neu sefydliadau eraill i weithio gyda chi ar eich prosiect yn briodol.

Gwerth cymorth mewn nwyddau

Gall hyn gynnwys gwaith gwirfoddolwr di-dâl, a rhoi tir, adeiladau neu gyfarpar. Nid ydym yn derbyn gostyngiadau gan gyflenwyr fel cyfraniad mewn da i'ch prosiect.

Dylech gyflwyno llythyr gyda'ch cais sy'n cadarnhau'r cymorth mewn nwyddau ac yn dangos gwerth y nwyddau neu'r gwasanaethau a roddir, a sut rydych wedi cyfrifo hynny.

TAW

Os nad ydych wedi cofrestru ar gyfer TAW, dylech gynnwys TAW yng nghyllideb eich prosiect.

Os ydych wedi cofrestru ar gyfer TAW, dylai cyllideb eich prosiect ond cynnwys TAW na allwch ei hawlio'n ôl (sef "TAW anadferadwy"). Nodwch sut rydych wedi cyfrifo'r TAW anadferadwy rydych wedi'i chynnwys yng nghyllideb eich prosiect.

Arian wrth gefn

Ar gyfer gwaith adnewyddu i adeiladau sy'n bodoli eisoes, argymhellwn gadw 10% o gost y prosiect wrth gefn.

Costau eraill

Nodwch unrhyw gostau eraill y bydd angen i chi eu talu fel rhan o'ch prosiect. Gall hyn gynnwys ffioedd cynllunio a thaliadau statudol, arolwg asbestos, arolwg strwythurol a chostau gwerthuso.

Incwm Prosiect

Defnyddiwch y templed i ddweud wrthym am yr incwm y byddwch yn ei ddefnyddio i dalu am y prosiect. Dylech roi enw pob partner cyllid, a ph'un a yw ei gyfraniad wedi'i gadarnhau neu'n destun cais.

Arian Cyhoeddus Arall

Yma soniwch am unrhyw grantiau gan sefydliadau cyhoeddus fel Llywodraeth Cymru, Awdurdod Lleol neu'r Undeb Ewropeaidd.

Cymorth mewn nwyddau

Dylai hyn gyfateb i unrhyw gost mewn nwyddau sydd wedi'i chynnwys yn eich ffigurau ar gyfer gwariant prosiect.

Incwm Arall

Yma soniwch am unrhyw incwm arall y byddwch yn ei ddefnyddio i dalu am y prosiect. Gall hyn gynnwys:

- Eich arian eich hun (ond os ydych yn aelod o Bortffolio Celfyddydau Cymru ni all hyn ddod o'ch grant refeniw)
- Incwm o godi arian, apeliadau cyhoeddus a rhoddion
- Grantiau gan Ddosbarthwyr eraill y Loteri
- Grantiau gan Ymddiriedolaethau a Sefydliadau eraill

Rheoli Risg

Dywedwch wrthym sut y byddwch yn nodi, yn monitro ac yn rheoli risgiau sy'n gysylltiedig â'ch prosiect

Yn eich cynnig prosiect, dylech wneud y canlynol:

- Dweud wrthym a ydych eisoes wedi nodi unrhyw risgiau
- Dweud wrthym sut y byddwch yn nodi ac yn rheoli risg drwy gydol eich prosiect
- Dweud wrthym pwy sy'n gyfrifol am reoli risg a hysbysu eich corff llywodraethu a'ch uwch aelodau o staff

Rydym yn chwilio am y canlynol:

- Dull cydlynol a strategol o ddadansoddi a rheoli risg.

[Yn ôl i'r tudalen Cynnwys](#)

Adran 3: Manylion yr Adeilad

Yn yr adran hon rydym yn gofyn i chi roi peth gwybodaeth sylfaenol am yr adeilad a gaiff fudd o'ch prosiect. Rhaid i chi hefyd ddangos eich bod yn ystyried rhwymedigaethau statudol allweddol sy'n gymwys i'ch prosiect.

Statws yr adeilad

Mae'n bwysig eich bod yn dweud wrthym am eich prydles. Er mwyn bod yn gymwys am gyllid, rhaid bod gennych o leiaf 25 mlynedd ar ôl o'r brydles.

Os yw'r adeilad ar brydles, rhaid bod gennych ganiatâd eich landlord ar gyfer eich prosiect. Rhaid i chi gyflwyno cadarnhad ysgrifenedig o ganiatâd eich landlord gyda'ch cais, os yw'n gymwys.

Os yw'r adeilad yn rhestredig, rhaid i chi ddweud wrthym a yw'n Radd II, Gradd II* neu Radd I. Dylech drafod eich prosiect gyda'ch awdurdod cynllunio lleol a / neu CADW. Yma dylech nodi canlyniad y trafodaethau hyn.

Rhaid i unrhyw waith a wnaiff newid cymeriad adeilad rhestredig gael Caniatâd Adeilad Rhestredig cyn iddo fynd rhagddo. Nodwch yma a ydych wedi cael Caniatâd Adeilad Rhestredig, neu a ydych yn aros am benderfyniad.

Arolwg Strwythurol

Nodwch a ydych wedi cynnal arolwg strwythurol o'ch adeilad wrth gynllunio a datblygu eich prosiect, a sut mae ei ganfyddiadau wedi effeithio ar eich prosiect.

Os ydych yn bwriadu cynnal arolwg strwythurol fel rhan o'ch prosiect, dywedwch wrthym yma. Nodwch sut y byddwch yn gallu ymateb i'w ganfyddiadau.

Os nad ydych yn credu bod angen cynnal arolwg strwythurol ar gyfer eich prosiect, nodwch pam.

Rhaid i chi gyflwyno copi o'ch arolwg strwythurol gyda'ch ffurflen gais, os yw ar gael.

Gofynion

Caniatâd Cynllunio

Nodwch statws eich cais am ganiatâd cynllunio.

Nodwch a ydych wedi gwneud cais am ganiatâd cynllunio **amlinellol** neu **llawn**, a phryd rydych yn disgwyl cael penderfyniad. Os rhoddwyd caniatâd cynllunio, nodwch unrhyw amodau cysylltiedig.

Rhaid i chi gyflwyno copi o'ch caniatâd cynllunio gyda'ch ffurflen gais, os yw ar gael.

Asbestos

O dan Reoliadau Rheoli Asbestos 2012 (a wnaeth ddisodli Rheoliadau Asbestos yn y Gwaith 2002), os ydych yn gyfrifol am gynnal a chadw eiddo annomestig, mae gennych ddyletswydd i reoli'r asbestos ynddynt, a diogelu unrhyw un sy'n eu defnyddio neu'n gweithio ynddynt rhag y risgiau iechyd sy'n deillio o asbestos.

Os byddwch am wneud unrhyw waith adeiladu neu gynnal a chadw ar y safle, neu ar beiriannau neu gyfarpar a allai gynnwys asbestos, rhaid i chi nodi ble y mae, pa fath o asbestos ydyw a'i gyflwr; asesu'r risgiau, a rheoli'r risgiau hyn.

Dylech nodi sut y byddwch yn cyflawni'r ddyletswydd hon i reoli mewn perthynas â'ch prosiect. Rhoddir rhagor o wybodaeth ar wefan yr Awdurdod Gweithredol Iechyd a Diogelwch: <http://www.hse.gov.uk/asbestos/regulations.htm>

[Yn ôl i'r tudalen Cynnwys](#)

Adran 4: Manylion y Prosiect

Yn yr adran hon gofynnwn i chi roi rhai ffeithiau a ffigurau am eich prosiect. Defnyddiwn y wybodaeth hon i'n helpu i fonitro'r hyn sy'n digwydd ledled Cymru ac i adrodd ar effaith ein cyllid.

Dyddiadau'r Prosiect

Dylai eich prosiect ddechrau pan ddisgwyliwch fynd i gostau. Er enghraifft, wrth brynu cyfarpar, gallai eich prosiect ddechrau pan fo'n rhaid i chi dalu blaendal. Ni allwn ariannu unrhyw weithgaredd sydd eisoes wedi digwydd.

Os cewch grant gennym, byddwn yn defnyddio'r dyddiadau hyn i ofyn am wybodaeth gennych fel adroddiadau ar gynnydd ac adroddiad cwblhau. Os bydd dyddiadau eich prosiect yn newid, rhowch wybod i ni cyn gynted â phosibl, gan nodi pam y gwnaethoch y newidiadau hyn.

Math o Gelfyddyd

Yma gofynnwn i chi nodi, ar ffurf canrannau, y mathau o gelfyddyd sy'n gysylltiedig â'ch prosiect.

Felly os bydd eich prosiect ond yn ymwneud â dawns (er enghraifft prynu llawr dawnsio cludadwy), dylech roi 100% wrth ymyl dawns yn y rhestr a roddir.

Os bydd eich prosiect yn ymwneud â mwy nag un math o gelfyddyd, rhaid i chi roi'r amcangyfrif gorau y gallwch o gyfran y gwahanol fathau o gelfyddyd y mae'n eu cynnwys. Er enghraifft, os mai prynu goleuadau newydd ar gyfer theatr yw diben eich prosiect, meddyliwch am y rhaglen y byddwch yn ei chyflawni a soniwch am y gwahanol fathau o gelfyddyd sydd dan sylw. Efallai y bydd eich ateb yn edrych rhywbeth fel hyn: drama 50%, cerddoriaeth 40% adloniant theatr 10%.

Cydraddoldebau

Mae sicrhau bod y trawstoriad ehangaf posibl o bobl yn gallu mwynhau'r celfyddydau a chymryd rhan ynddynt yn hanfodol i'n gwaith. Fel corff cyhoeddus mae gennym gyfrifoldeb diwylliannol, moesol a chyfreithiol i hyrwyddo cydraddoldeb a chynhwysiant. Rhown bwys mawr ar y cyfrifoldeb hwn.

Rydym am sicrhau ein bod ni a'r sefydliadau rydym yn eu hariannu yn meithrin gwybodaeth a dealltwriaeth gynhwysfawr o amrywiaeth a chydraddoldeb. Hoffem weld mynediad mwy cyfartal i'r celfyddydau, boed hynny fel cynulleidfaoedd neu gyfranogwyr, felly rydym am i'n harian weithio'n galetach o ran cyrraedd y bobl hynny sy'n dioddef anghydraddoldeb. Rydym hefyd am ddathlu'r rôl y gall y celfyddydau ei chwarae wrth hyrwyddo cydraddoldeb,

gan gynnwys meithrin gwell cydberthnasau rhwng pobl sy'n dioddef anghydraddoldeb a'r rheini nad ydynt.

Er gwaethaf y gwaith da a wneir gan lawer o artistiaid a sefydliadau celfyddydol, gwyddom fod rhai pobl yn wynebu rhwystrau o ran mwynhau'r celfyddydau. Dyma un o'r rhesymau pam y cymerwn Gydraddoldeb gymaint o ddifrif. Fel corff cyhoeddus mae'n ofynnol i ni, o dan y gyfraith, gasglu a monitro gwybodaeth am bwy sy'n elwa o'n cyllid. Mae hyn yn ein helpu i adrodd ar ein cynnydd wrth fynd i'r afael ag anghydraddoldebau yn y celfyddydau a thargedu cyllid ble mae ei angen fwyaf.

Mae Deddf Cydraddoldeb 2010 yn sôn am bobl â nodweddion gwarchoddedig ac rydym yn casglu gwybodaeth am brosiectau celfyddydol sy'n targedu ac yn cyflawni gweithgareddau yn benodol ar gyfer y grwpiau hyn o bobl. Ar hyn o bryd, rydym yn casglu gwybodaeth am grwpiau gan ddefnyddio'r rhestr a geir yn Neddf Cydraddoldeb 2010. Felly, rydym yn gofyn i chi ddweud wrthym a yw eich gweithgareddau ar gyfer pobl o grŵp oedran penodol, pobl anabl, pobl o hil, crefydd neu gred benodol, p'un a yw'r gweithgaredd ar gyfer dynion yn unig, menywod yn unig, neu'n canolbwyntio ar gyfeiriadedd rhywiol, ailbennu rhywedd, neu feichiogrwydd a mamolaeth.

[Yn ôl i'r tudalen Cynnwys](#)

Adran 5: Datganiad

Yn y rhan hon o'r ffurflen gais, rydym yn gofyn i chi ddarllen peth gwybodaeth bwysig am ein cyfrifoldebau o ran Diogelu Data a Rhyddid Gwybodaeth. Mae'n bwysig eich bod yn deall sut y bydd y wybodaeth a roddir gennych yn cael ei defnyddio a'i chadw gennym. Ac mae angen i chi wybod beth i'w wneud os credwch fod unrhyw wybodaeth sydd gennych yn fasnachol sensitif neu'n gyfrinachol.

Yna gofynnwn i chi gadarnhau nifer o ddatganiadau. Drwy dicio'r blwch rydych yn llofnodi'r ffurflen gais yn electronig ar ran eich sefydliad.

[Yn ôl i'r tudalen Cynnwys](#)

Adran 6: Atodiadau

Mae'r rhan hon yn eich galluogi i gyflwyno eich holl ddogfennau ategol, sef atodiadau ar ein system ar-lein.

Rydym wedi dangos yr atodiadau y mae'n rhaid i chi eu cyflwyno gyda'ch ffurflen gais. Dyma nhw eto:

- Cyllideb eich prosiect (rhaid ei chyflwyno ar ein Templed Cyllideb Prosiect wedi'i lawrlwytho)
- Dadansoddiad manwl o'r costau adeiladu, dodrefnu a chyfarpar er mwyn cefnogi cyllideb eich prosiect.
- Eich Briff Prosiect Terfynol
- Set lawn o ddarluniau dylunio a gymeradwywyd gan eich sefydliad (Bydd angen i chi gyflwyno tri chopi caled o'r rhain (oherwydd eu maint ni ellir eu hatodi i'ch cais ar-lein. Ceir rhagor o wybodaeth ar y ffurflen gais)
- Rhestr o gyfarpar i'w brynu ac unrhyw fanylebau technegol
- Eich Cynllun Busnes
- Eich dogfen lywodraethu
- Prawf bod gennych gyfrif banc yn enw eich sefydliad lle mae angen i o leiaf ddau o bobl awdurdodi trafodion. (Noder na allwn dderbyn cyfrifon cymdeithas adeiladu sy'n gweithredu â phaslyfr yn unig).

Cofiwch fod y rhain yn orfodol. Maent yn rhan allweddol o'n hasesiad ac ni fyddwn yn gallu derbyn eich cais hebddynt.

Os byddwn wedi cael copi o'ch dogfen lywodraethu ers mis Ionawr 2016, dim ond os yw wedi newid y bydd angen i chi ei hailgyflwyno. Nid oes angen i chi ddarparu eich dogfen lywodraethu os ydych yn gyngor tref, awdurdod lleol, corff iechyd neu brifysgol.

Sut i lanlwytho eich dogfennau

Defnyddiwch y gwymplen ar waelod y sgrin i lanlwytho eich dogfennau. Ceir yr holl ddogfennau gorfodol yn y gwymplen. Hefyd ceir categori "Arall". Gallwch ddefnyddio'r holl gategorïau hyn fwy nag unwaith, ond nodwch mai 60MB yw'r maint ffeil mwyaf ar gyfer atodiadau.

[Yn ôl i'r tudalen Cynnwys](#)

Os bydd angen help arnoch gyda fformatau dogfennau neu os hoffech gael rhagor o wybodaeth am faterion technegol eraill, darllenwch ein Taflen Wybodaeth ar Wneud Cais Ar-lein, neu edrychwch ar ein canllaw datrys problemau ar gyfer atodiadau.

Gwybodaeth ategol arall

Gwyddom fod prosiectau cyfalaf yn gymhleth, a bydd angen gwahanol wybodaeth ar wahanol brosiectau. Efallai y bydd angen i chi gyflwyno rhai o'r canlynol er mwyn ategu eich cais, y gallwch eu lanlwytho gan ddefnyddio'r categori "arall" o'r gwymplen:

- Adroddiad(au) tendr
- Dyfynbrisiau cyflenwyr / contractwyr
- Strategaeth Codi Arian
- Tystiolaeth o gyllid partneriaeth a sicrhawyd hyd yn hyn
- Llythyrau yn cadarnhau unrhyw gymorth mewn nwyddau
- Tystiolaeth o alw am eich prosiect
- Arolwg strwythurol
- Arolwg asbestos
- Dogfennau caniatâd cynllunio
- Caniatâd Adeilad Rhestredig
- Caniatâd gan eich landlord i'ch prosiect fynd rhagddo

Os na fyddwch yn siŵr pa wybodaeth sydd ei hangen ar gyfer eich cais, gofynnwch i ni. Os na fydd peth o'r wybodaeth hon ar gael eto, gallwn ofyn i hynny fod yn un o'ch amodau grant.

Efallai y byddwch hefyd am roi enghreifftiau o'ch gwaith creadigol neu brosiectau tebyg eraill rydych wedi'u cwblhau.

[Yn ôl i'r tudalen Cynnwys](#)

Adran 7: Adolygu fy Nghais

Mae'r rhan hon yn eich galluogi i adolygu'r wybodaeth rydych wedi'i rhoi hyd yn hyn, a gwneud unrhyw newidiadau. Bydd ein system ar-lein hefyd yn dweud wrthyfch os ydych wedi methu unrhyw gwestiynau. Os byddwch yn fodlon ar eich cais gallwch glicio ar Cyflwyno. Bydd hyn yn anfon eich cais atom i'w ystyried.

Bydd copi o'ch cais wedi'i gwblhau bob amser ar gael ar ein system ar-lein i chi ei weld, ar ôl i chi glicio ar y botwm i'w gyflwyno. Bydd o dan yr adran "ceisiadau sydd wedi'u cyflwyno" ar ein system ar-lein, ar ôl i chi fewngofnodi. Gallwch hefyd argraffu copi i gadw.

Unwaith y byddwch wedi clicio ar Cyflwyno cewch gydnabyddiaeth awtomatig drwy e-bost. Os na fyddwch yn ei chael gwnewch yn siŵr nad yw yn eich ffolder post sothach. Os na fyddwch wedi cael y neges o hyd, edrychwch ar eich ffurflen gais a cheisio clicio ar Cyflwyno eto.

Os nad yw eich cais wedi'i gwblhau, cliciwch ar Cadw a Gorffen yn Nes Ymlaen. Yna cewch e-bost sy'n cynnwys copi o'ch fersiwn ddrafft. Cadwch yr e-bost er gwybodaeth.

Bwrw golwg dros eich cais

Byddwn yn cadarnhau bod eich cais wedi ein cyrraedd drwy anfon cydnabyddiaeth atoch drwy e-bost. Bydd hefyd yn gofyn i chi lenwi eich Ffurflen Monitro Cyfle Cyfartal drwy glicio ar y ddolen i'r dudalen benodol ar ein gwefan. Ni ellir ystyried bod eich cais yn gyflawn nes i'r ffurflen hon gael ei llenwi a'i chyflwyno.

Byddwn yn edrych dros eich cais ac yn ei roi i swyddog. Dim ond ceisiadau cyflawn y gallwn eu hasesu, hynny yw ceisiadau sy'n cynnwys yr holl wybodaeth y gofynnwyd amdani mewn digon o fanylder i'n galluogi i gynnal asesiad priodol. Os na allwn asesu eich cais, byddwn yn nodi'r prif resymau dros hyn.

Beth i'w wneud os na allwch dderbyn arian gan y Loteri Genedlaethol

Os na allwch dderbyn arian loteri am resymau crefyddol, lanlwythwch lythyr gyda'ch cais yn egluro pam. Os bydd eich cais yn llwyddiannus, byddwn yn ceisio ariannu eich prosiect drwy ffynonellau eraill.

Ymwadiad

Rydym wedi ceisio sicrhau bod y wybodaeth a roddir gennym yn gywir. Nid ydym yn tybio nac felly yn datgan unrhyw gyfrifoldeb i unrhyw un am golled neu ddifrod a achosir gan gamgymeriadau neu hepgoriadau yn y wybodaeth a roddir gennym, p'un a yw'r camgymeriadau neu'r hepgoriadau hyn wedi'u hachosi drwy esgeulustod, damwain neu unrhyw reswm arall.

Cysylltu â Ni

Os bydd angen unrhyw wybodaeth arall arnoch er mwyn cwblhau eich cais ar-lein gallwch gysylltu â ni:

Ffôn: 0845 8734 900 (cyfraddau galwadau lleol)

Ffôn testun: 029 2045 0123

SMS: 07797 800 504 (codir eich cyfradd rhwydwaith safonol am negeseuon)

E-bost: funding@artswales.org.uk

Gwefan: www.celfcymru.org.uk

[Yn ôl i'r tudalen Cynnwys](#)